

漢魏六朝百三家集

陸清河集卷之二

晉吳郡陸雲著

明太倉張溥閱

贊

榮啓期贊

榮啓期者周時人也值衰世之季末當王道頽  
凌遂隱居窮處遺物求已泝懷玄妙之門求意  
希微之域天子不得而臣諸侯不得而友行年  
九十被裘鼓琴而歌孔子過之問曰先生何樂

答曰吾樂甚多、天生萬物、唯人爲貴、吾得爲人  
矣、是一樂也、以男爲貴、吾又得爲男、是二樂也、  
或皆不免於襁褓、而吾行年九十、是三樂也、夫  
貧者士之常也、死固命之終也、居常待終、當何  
憂乎、孔子聽其音、爲之三日悲、常被裘帶索、行  
吟於路曰、吾著裘者何求、帶索者何索、遂放志  
一邱、滅景榛藪、居眞思樂之林、利涉忘憂之沼、  
以卒其天年、榮華溢世、不足以盈其心、萬物兼  
陳、不足以易其樂、絕景雲霄之表、濯志北溟之



津豈非天真至素體正含和者哉友人有圖其  
象者命爲之贊其辭曰、

芒芒至道天啓德心自昔逸民遁志山林邈矣  
先生如龍之潛夷明收察滅迹在陰傲世求已  
遺物自欽景遯瓊輝響和絕音戀彼邱園研道  
之微思樂寒泉薄採春蕤鳴絃清泛撫節高徽  
有聖戾止永言傷悲天造草昧負道實嘉於鑠  
先生旣體斯和熊羆作祥黃髮皤皤耽此三樂  
遺彼世華翼翼彼路行吟以遊的的黻冕陋我

輕裘永脫亂世受言一邱媚茲常道聊以忘憂

箴

逸民箴

余昔爲逸民賦大將軍掾何道玄大府之俊才也作反逸民賦盛稱官人以美寵祿之華靡偉名位之大寶斐然其可觀也夫名者實之賓位者物之寄窮高有必顛之吝溢美有大惡之尤可不慎哉故爲逸民箴以戒反正焉

浩浩太素制爲兩儀經始君臣朝有俊弼野有逸民各有攸屆而後品物有倫在昔后帝齊物

達觀賞不假爵，敎不示勸，號謚莫設，而生黎淳  
晏降迄中古，黃象可觀，而唐文有煥，乃雕乃藻。  
太樸既散，樸之既散，萬百熙心，形爲寵放，神爲  
利淫，有翹者車，命彼在林，是故懷玉喪寶，而被  
褐解襟，恬亡智生，與世或競，匪智無鑒，匪心伊  
鏡，芒芒禹迹，鞠爲塗徑，惟是每懷，偏彼反正，正  
反於寵，既尸干祿，相協厥居，而豐其屋，祿之既  
尸，刑爲爾司，屋之既豐，喪家于宮，故非據之災，  
戒之在凶，人皆知存之爲存，而莫知得之爲喪。



榮猶振穎墜若頽荒咎自專寵福在循牆是故  
保其安者常危而忘其存者不亡無休爾榮身  
寔親名無謂爾崇神期好冲戒彼覆餗冒此棟  
隆慎微如顯乃保身以終自古在昔逸民有作  
相彼宇宙方之委鳥夫豈無不休而好是冲漠  
是故名利之災至人攸恪謂予未信無甯監于  
桑霍天明旣畏神道無親善在求已慶由積仁  
無念爾本聿修厥淳執盈如虛乃反天真逸民  
司正敢告官人





碑

泰伯碑

夫至仁至德垂風垂化內脩訓範外陶氓俗百  
年之教涓道載凝而百年旣終遺愛斯軫莫不  
肅虔寢廟著名金石遺其後昆聿遵前典是以  
禹堂旣毀增飾丹青堯碑載焚重覩刊勒泰伯  
膺慶二儀協靈七曜志輕天下慈深萬物脫屣  
岐周克讓之風斯舉端委揚越衣冠之俗載成  
重以仲雍揚波延陵蹈節民習敦厚俗懷忠信

憂深思遠，千載遺風。美哉洋洋，致足觀也。昔滄  
洲遁迹，箕山辭位，志守幽優，不越樽俎，猶以稱  
首高節，標名往代。豈若吾君之子，義結民心，獄  
訟載歸，謳歌屢請，能舍玉輿之貴，永襲皮冠之  
迹，悠然獨往，信無德而稱焉。吳啓金車，晉遷紫  
蓋，實號帝鄉。爰是天邑，若乃忠人入國，悽愴生  
悲，殉義希風，懦夫立志。

頌

登遐頌

夫死生存亡二理之已然者也。而世有神仙登遐之言。千歲不死之壽。其詳固難得而精矣。列仙之道。作者既集。而登遐未有焉。莊周有言。我試妄言之。子試妄聽之。彼之有無。蓋難以理求。我之妄聽。顧可以言寄之。遂爲頌云爾。

郊間人

王子喬

玄洛

孔仲尼

九疑仙人

大勝山上女

李少君

梅福

張招

左元放

劉根

黃伯嚴



費長房

何女子

焦生

鮮卑務塵

韓衆

夷門子

林陽子

任作子

鬼谷子

淵哉郊間懷寶採薪媚茲伯陽常道是夤俯翼  
遊周攜手入秦遺物執一妙世頤神思我玄流  
浩若無津王喬淵嘿遂志潛輝遺形靈嶽顧景  
亡歸變彼有傳與爾翻飛承雲儵忽飄颻紫微  
玄洛妙識飢餌神頴在陰儵逝卽陽無景逍遙  
北嶽凌霄引領揮霧昊天合神自靖孔丘大聖  
配天弘道風扇玄流思探神寶明發懷周興言

謨老靈魄有行言觀蒼昊清歌先試丹書有造  
茫茫九疑登暉太素有漢登聞神具爾顧發彼  
靈邱聿來載步貽我則歌永揚遐祚大勝之娥  
厥猶翼翼降宮有和納符帝側揮袂指辰絕音  
頽息茗茗立右在彼峻極少君善祠怡爾豐顏  
俯覲劉漢仰接姜桓式宴安期巨棗爲餐神光  
攸往後來其嘆在漢之衰頽火炎精梅公指景  
有皇遺形逝彼文辭胥此洞庭神輝絕景豈外  
北冥張招澄精妙思玄芒則是神物錯綜徽章

乃幽乃顯，若存若亡。因形則變，倏忽無方。生在  
清純，放情玄昧。在物淵沉，泝虛攸遂。清酒一壺，  
百朋具醉。有命集止，乘龍來萃。載見君子，言觀  
其蔚。劉根登嵩，遺世盤桓。形委服容，口厭瓊蘭。  
挹彼呼翁，爲爾朝餐。景絕巖穴，光茂雲端。伯嚴  
志道，飜飛自南。北食中嶽，練形嵩岑。奔星凌顏，  
朱光垂陰。雲精九握，耀盈襟。長房有懷，承師  
問道。蒙險洪海，晞心玄浩。將登蓬萊，祚爾難老。  
嘉命旣錫，如何勿考。逝矣何女，芳靈旣彫。安寢

曾邱逝魂清霄喪魄載營大墓崇朝玉趾再步  
於焉逍遙焦生卜居在河之東皓襟解帶嘉卉  
結容頤神太素淑思立冲在彼黃堂明道固窮  
北狄務塵在彼沙漠含神自頤靜居有恪自彼  
王庭聿來伊洛天子命之載見紫閣衛矣終化  
靈毛揚葩慎爾貞心神祉來荷靡靡夷門體道  
含真食茹靈卉凌雲頤神林陽餌東明視聰耳  
壯子旣食步晞千里任化凱入輕雲揮止移形  
善變載坐載起悠悠鬼谷永言潛止要終有集



資生無始綢繆方平在彼二子芬響蘭揮有來

盈耳